

Center naziunal per il sport d'enviern en Grischun

La regenza è pronta d'acceptar ina incumbensa parlamentara da deputà Rudolf Kunz (pld Cuira)

■ (mc) L'Uffizi federal da sport examinescha actualmain la realisabladad d'in center per il sport d'enviern ad Andermatt. En ina moziun supplitgescha il deputà Rudolf Kunz (pld Cuira) la regenza d'er examinar lieus adattads per in tal center en il Grischun e d'inoltrar a temp propostas correspondentas a la confederaziun. Per Rudolf Kunz e 93(!) ulteriurs deputads èsi cler che sch'i dat in center per il sport d'enviern en Svizra sto quai esser en il Grischun. La regenza è pronta d'acceptar questa incumbensa.

Gia fatg sondagis ad Andermatt

Sco quai che Rudolf Kunz constatescha sin fundament d'in artitgel en la gasetta «NZZ am Sonntag» ha la confederaziun gia fatg sondagis ad Andermatt perquai ch'ella tgiria gia oz là stabiliments da sport per las sportistas e per ils sportists da l'armada e d'elita. Era la regenza conferma che l'Uffizi federal da sport examineschia la realisabladad per il sport d'enviern ad Andermatt. Quai saja succedi senza ch'è fiss vegnì fatg ordavant in'evaluaziun dal lieu adattà en tut la Svizra. Andermatt saja en il focus dal departament en emprima lingia perquai ch'il Departament federal da defensiu, protecziun da la populaziun e sport disponia là gia da la gronda part da l'infrastructura necessaria. Quest fatg premetessia ina realisaziun relativamain «facila» ed a curta vista. Ultra da quai saja Andermatt situà geograficamain central e saja era cuntranschibel bain cun il traffic privat e public da tut la Svizra. Actualmain saja il project però anc en il status d'ina «fatschenta interna dal departament». Fin la fin da quest onn duai vegnir sclerì sche l'armada po desister da l'areal e da l'infrastructura ad Andermatt a favur d'in center naziunal per il sport d'enviern, scriva la regenza. Alura possia vegnir decidì davart l'ulteriur proceder.

Tenero la stad – Tavau l'enviern

Quai che il Center da sport Tenero en il



Tessin è per il sport da stad duai Tavau daventar per il sport d'enviern. Da quest avis è Rudolf Kunz e cun el ina gronda maioritad dal cussegl grond. Per els èsi cler ch'il Grischun è directamain predestinà da porscher in lieu per in center per il sport d'enviern. A Tavau per exempel dessi la pussaivladad d'exequir tut ils tipics sports d'enviern sin nivel il pli aut. Gia oz ha la Federaziun svizra da skis numnadamain là ses center naziunal da trenament. Il hockey sin glatsch, il patinadi da sveltezza e blers auters sports han ina lunga tradiziun a Tavau. In ulteriur lieu pussaivel fissi era Cuira, manaja

Kunz. Da là cuntanschian ins en pauc temp territoris da sport d'enviern enconuschents. Plinavant stessia a disposiziun a S-chanf in stabiliment militar ch'ins pudessia eventualmain duvrar per in auter intent.

Turissem d'enviern è ina pitga economica impurtanta

La regenza beneventa las stentas per stgaffir in center naziunal per il sport d'enviern damai ch'il turissem d'enviern è ina pitga impurtanta da la rendita per nossa economia e la promoziun da la nova generaziun ha ina gronda muntada

per la prosperitad futura dal chantun. In «Tenero per il sport d'enviern» duai numnadamain pudair vegnir duvrà tant da scolas, d'uniuns e da chantuns per champs cun uffants e juvenils sco er per scolaziuns. Las pretensiuns concernent l'infrastructura sajan gia vegnidadas definidas e sajan enconuschentas a la regenza.

Bun augment da las pernottaziuns

Enl Center per il sport da stad a Tenero vegn generà tenor Rudolf Kunz 130 000 pernottaziuns. Sco la regenza scriva quintan stimaziuns approximativas da l'Uffizi federal da sport cun var 46 000

pernottaziuns per onn en in center per il sport d'enviern. Quai correspundia a bunamain 1 pertschient da las pernottaziuns en il chantun Grischun. Tenor l'esperienza vegnian ultra da quai participantas e participants da champs u curs a returnar al lieu cun il qual els collian regurdientschas ed emoziuns positivas. «In center per il sport d'enviern è perquai er in'ocasiun ideala per preschentar a las gruppas che fan sport d'enviern e sport sin glatsch la pussaivladad excellentas dal lieu.»

Connex cun ils gieus olimpics

Malgrà ch'in pèr factors pledan per realisar in center ad Andermatt è la regenza pronta d'examinar la realisabladad en il chantun Grischun. En spezial duai l'Uniun Gieus olimpics d'enviern 2022 en il Grischun sclerir la realisabladad a Tavau. Cun la realisaziun d'in tal center pudessia vegnir utilisada en moda persistente l'ulteriura part dals stabiliments planisads fin ussa temporarmain en il rom dals gieus olimpics. Els pudessian era daventar in relasch per la giuventetgna, è la regenza persvadida. La situaziun in pau periferica en cumparegliaziun cun Andermatt pudessia vegnir cumpensada tras la diversitad dals pussaivladads da sport. Tavau porschia ultra dal sport da naiv er ina infrastructura per il sport sin il glatsch (hockey, patinadi artistic, patinadi da sveltezza). La vischnanza da la scola da sport da «Swiss Olympic» e dals centers naziunals da trenament pudessia esser in ulteriur avanzatg, manaja la regenza. Cuntrari a la confederaziun na vulesch la regenza dal Grischun però betg sa concentrar sin in sulet lieu senza avoir fatg in'evaluaziun precedentia, mabain integrar ulteriurs lieus pussaivels da realisaziun en sias ponderaziuns. «Er ina cooperaziun da las vischnancas grischunas al cunfin dal chantun cun Andermatt duai vegnir examinada», tira la regenza en consideraziun.

Cun la scola da sport da Swiss Olympic avess Tavau era bunas premissas da daventar in center naziunal per il sport d'enviern.

MAD